



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Außlegung der Episteln vnd Euangelien: von Ostern bis auff das Aduent**

**Luther, Martin**

**Wittemberg, 1547**

**VD16 L 5614**

2 Eintrechtig zeugnis aller Propheten von Christo/ Vnd der rechten Kirchen  
Lere vnd Glaube von anfang her.

**urn:nbn:de:hbz:466:1-37032**

## Auslegung der Epistel

kennt) dadurch wir erlöset von der furcht vnd schrecken für Gottes zorn/ ein gut gewissen/ trost vnd sieg wider die Sünd vnd ewigen tod/ haben mögen/ vnd ewig selige Leute/ Könige vnd Herrn im Himmelreich sein. Vnd was ist hiegegen weltliche gewalt/ herrschafft/ gold/ silber vnd reichthumb aller Königreiche auff Erden?

**S**iehe / das ist der schatz vnd das gut / so dieser König vnd Herr durch seine Auferstehung vns erworben/ vnd durch diese Predigt vns bringet vnd gibt/ Welchs heisse vergebung der sünden/ damit er deutet vnd auslegt/ das/ so er droben genennet / die verkündigung oder predigt des friedes / Denn solcher friede/ ist nicht anders/ denn vergebung der sünden haben / in welchem einigem wort begriffen wird/ die ganze Summa des Euangelij / das ist / der gnade vnd wolthat Christi / Denn bey vergebung der Sünde/ mus auch sein/ erlösung vom ewigen Tode vnd des Teufels gewalt/ gerechtigkeit / heiliger Geist / vnd ewiges Leben. Dieses alles wird vns zu gleich gegeben vñ geschenckt / vnd doch also / das wir es jetzt noch nicht offenbar für augen vñ sinnen/ sondern in der predigt vnd gewissen zusage haben / bis wir es auch öffentlich für augen vñ in besitzung werden habe.

Vergabung der sünde.

**2**  
Glaube.

**I**m andern / leret auch dieser Spruch / was zu solcher Predigt gehört / vñ wie sie bey vns fruchtbar wird / das wir das / so sie bringet/ erlangen / Nämlich / das es geschicht durch den Glauben / der solchs / so im Euangelio vns wird surgetragē / fasset. Denn dazu wird es gepredigt / das wir es annehmen vnd halten / vnd wird also durchs Wort vns zu gesprochen / dar gereicht oder zu geeignet vñ geschenckt. Durch den Glauben aber von vns empfangen / das es vnser ist / vnd seine krafft in vns wirken/ das ist/ den frieden vnd vergebung der Sünden (das ist/ Gnade vñ Seligkeit) vns geben kan.

**3**  
In Christi Namen.

**E**r Glaube aber mus also gethan sein/ das er das stück fasse vnd fest halte / so alhie S. Petrus setzt vnd spricht/ In seinem Namen / Das ist / das er Christo allein die

ganze ursach/ verdienst vnd krafft/ der vergebung der sünde zuschreibe / Vnd glaube/ das wir solchs erlangen vnd haben/ nicht durch oder vmb vnser eigen würdigkeit oder verdienst/ Sondern allein durch Christi willen/ vñ aus krafft seiner Auferstehung / vergebung der sünde erlangen / Das also hie mit rein vnd durre ausgeschloffen vnd weg genommen sey / alles was man nemen mag/ so nicht Christus ist/ vñ jm alleine diese ehre bleibe.

**D**enn was ist es mit aller menschen thun vnd vermögen auff Erden / das es solt solch gros ding (nämlich/ vergebung der sünde vnd erlösung vom ewigen zorn vñ tod) auerichten oder verdienen / oder das zu vergleichen sein möchte mit dem tod vñ blut des Sohns Gottes / oder der krafft seiner Auferstehung / Vnd die ehre neben jm haben/ das es solt dienē vergebung der sünde/ vñ erlösung vom tod zu erlangen. Das wil er gepredigt vnd geglaubt haben in aller welt / Vnd hebt damit auff allen rhyum der Jüden vnd aller Werckheiligen/ das sie sollen wissen / das sie nicht durch das Gesetz vnd eigen werck bey Gott Gnade erlangen können / Sondern in dieses Christi Namen allein vergebung der sünde / durch den Glauben empfangen.

**4**  
Vnd solchs (spricht er) sey zu

**U**or bezeuget in der Schrift vñ verkündigt durch alle Propheten. Das ist je ein herrlich zeugnis / vnd solt je das Jüdische Volk den selbigen iren eigen Propheten glauben / wo sie nicht mutwillig verstockt vnd verdampft sein wolten. Viel mehr aber wir heiden / so doch on das müssen bekennen/ das wir ja nichts dazu gethan noch gearbeitet haben / das vns solche Gnade angeboten vñ geschenckt wird. Vnd solten ja so from sein / das wir Christo die ehre heten / vnd den Aposteln vnd der ganzen Schrift glauben / Vñ vns schemen/ das wir erst darob zweifeln oder zanken solten/ ob wir allein durch Christi willen (wie alle Schrift sagt / Vnd wir / so wir rechte bekennen wolten / selbs sagen müssen) oder auch durch vnser werck / vergebung der sünde erlangen / oder für Gott gerecht werden.





Also hören wir hie / was da sey die Summa vnd die Heubtle der ganzen Schrifft / dahin es alles furnemlich vnd endlich gehet / Nemlich / diesen Artikel zu leren vnd zu bestetigen / das wir nicht anders / denn vmb Christi willen / durch den Glauben / vergebung der Sünden haben / Vnd das dis sey der Vetter vnd Propheten / vnd aller Heiligen von anfang der Welt / Glaube gewesen / vnd hernach Christi vnd der Aposteln lere vnd Predige / welche inen befohlen in alle Welt zu tragen / vnd aus zu breiten / Vnd auch noch auff diesen tag / vnd ans ende / der einhellige verstand vñ haltung ist der ganzen Christlichen Kirchen / die allzeit eintrechtig vnd sampelich diesen Artikel geglaubt / bekand / vnd darob gestritten haben / das allein in dieses Herrn Christi namen / vergebung der sünde erlangt vnd empfangen werde / Vnd in diesem Glauben sind für Gott gerecht vnd selig worden . Vnd ist also durch solch zeugnis / der grund vnser lere starck grund gelegt / vnd lang vor vns gewaltiglich erstritten / verteidigt vnd erwiesen .

**Frumb / wer nu noch dar-** nach fragt / vnd eigentlich begeret zu wissen / was die Christliche Kirche allezeit lere vnd halte / sonderlich in dem hohen Heubtarikel / wie man für Gott gerecht werde / oder vergebung der Sünden erlangt / darob allzeit in der Welt streit gewesen / Der hat es alhie klar vñ gewis in diesem spruch / vnd höret das rechte beständige zeugnis der ganzen Kirchen / von anfang her / das man nu nicht darff weiter hie von disputiren / vnd niemand billich kan vrsach fürwenden / noch entschuldigung haben seines zweuelns / oder auff weiter beschlus oder örterung der Concilien zu warten zc .

Dem hie hörestu / das es schon lengst vnd vor alters beschloffen vnd bestetigt ist ( durch die Kirche der ersten Vetter / Propheten vnd Aposteln ) vnd ein fester / vnbeuoglicher grund gesetzt ist / welchen auch alle Menschen schuldig sind / bey irer ewiger Seligkeit zu halten vnd zu glauben / Gott gebe / was da jmer mehr von andern Concilijs vnd aller Welt disputirt / gesetzt / vnd

beschloffen werde / Ja auch allbereite hie mit vns allen das vrtail gegeben ist / vnd befohlen zu meiden vnd zu fliehen / was da anders glauben oder leren / ordnen vnd setzen wil / Wie auch S. Paulus Gala. 1. sagt / So jemand ein ander Euangelium leren wolt / denn je gehört vnd empfangen habet / der sey verflucht / wenn es auch ein Engel vom Himmel were .

Draus sihestu / wo wider jetz das gang Vapstum / mit alle seinem anhang / tobet vnd wüet / vnd wo für sie zu halten sind / die diesen Artikel / so hie S. Petrus predigt vnd bestetigt / durch aller Propheten vñ der ganzen Schrifft zeugnis / nicht hören noch leiden wollen / vnd nicht auffhören / darob frome / vnschuldige Leut zu verfolgen / Eszen mit dem schein / das sie die Kirche sein wollen / vnd der selben Namen auffs höchst wider vns rühmen / So sie doch mit irer lere / Glauben vnd that / vber sich selbs zeugen / das sie aller Propheten / vnd also der ganzen Kirchen zeugnis zu wider glauben vnd leren .

Diese können je nicht die Kirche Christi sein / weil sie so thürstiglich vnd vnuerschempt Sanct Petro vnd aller Schrifft widersprechen / ja Christum selbs / als das Heubt / in seinem Wort / mit füßen treten / Sondern müssen des leidigen Teufels verdampfte Kotte sein / vnd der Christlichen Kirchen höchste feinde / erger vnd schedlicher / denn keine Heiden oder Türcken sind .

**Beht / wil auch S. Petrus** mit diesem spruch beweisen / vnd alle welt gewis machen / das dieser vnser Herr ( wie er in mit Namen nennet / Ihesum von Nazaret ) der rechte Messias vnd Christus sey / der in der Schrifft zuuor verheissen ist / Dem eben diesem ( spricht er ) geben alle Propheten zeugnis etc. Denn sie reden deutlich von einer solchen Person / von Dasuids Blut vnd Fleisch geboren / aus der Stad Bethlehem / etc. der da würde leiden vnd sterben / vnd wider auffstehen / Vnd solches thun vnd aufrichten / das dieser Ihesus gethan vnd erfüllet / dazu mit Wunderzeichen erweist vnd bestetigt hat. Darumb auch die Jüden vnd Vnchristen

Vapstums) Kotte / wider der rechte Christlichen Kirchen lere vnd Glauben .

Vapstums) sind nicht die Kirche / sondern der selbe feinde

Das dieser Ihesus / der rechte Messias sey .